



0 90757

王會篇箋釋卷下

其西般吾白虎

光澤何秋濤願船
大陳茂
香山堂

孔氏曰次西也般吾北狄近西也王氏補注曰鄭志

張逸問詩傳白虎黑文答曰周史王會云王氏自注

下闕黑文二詩釋文騶虞義獸也白虎黑文不食生物王氏自注

死之獸子注食自有至信之德則至周書王會草木疏並同

又云尾長於身不履生草說文彪白虎也王氏自注

爾雅彪白虎彪胡甘切瑞應圖白虎者仁而不殺王

者不暴虐恩及行葦則見王氏自注漢宣帝時南郡

濤按此淮南子散宜生得白虎獻紂獲白虎獻其皮骨爪牙秋

王會篇箋釋 卷下

一

秋濤曰自此下至匈奴皆西北之國般吾疑即昆吾

昆般古聲同部也地在今哈密境內大荒南經曰又

有白水山白水出焉而生白淵昆吾之所浴也郭注

昆吾古王者號音義曰昆吾山名海內經曰有昆吾

之邱郭曰此山出名金也尸子曰昆吾之金元和郡

縣志曰伊州禹貢九州之外古戎地稱昆吾周穆王

伐昆戎昆吾獻赤刀後轉為伊吾周衰為匈奴所得

漢武帝時驃騎將軍擊破匈奴右地始築令居以西

初置酒泉郡復分置武威張掖敦煌列四郡置兩關

焉兩關即玉門陽關也王莽時地屬匈奴後漢明帝

永平十六年北征匈奴取伊吾廬地置宜禾都尉以

爲屯田兵鎮之所。未爲郡縣。後復爲匈奴所得。自建武至於孝和。三通三絕。至順帝時。以伊吾舊膏腴之地。傍近西域。匈奴資之以爲鈔暴。開設屯田。如故事。置伊吾司馬一人。至魏。立伊吾縣。晉立伊吾都尉。並寄理敦煌北界。非今之伊州。後魏及周。又有鄯善人來居之。大業三年。得其地。以爲伊吾郡。隋末。又爲羣夷居焉。貞觀四年。內附。於其地置伊州。州境東西一千一十五里。南北四百九十里。西南至西州七百三十里。東南取莫賀磧路至瓜州九百里。正南微東至沙州七百里。領縣三。伊吾柔遠納職。又伊吾縣。在伊州郭下本漢伊吾屯。貞觀四年置縣。後漢書西域傳。伊吾

王會篇箋釋

卷下

二

地宜五穀桑麻葡萄。其北又有柳中。皆膏腴之地。故漢常與匈奴爭之。以制西域云云。蓋昆吾之地。唐爲伊州。今爲哈密。皆西方重鎮也。邵氏晉涵曰。漢儒以白虎擾爲思睿。信立之應。四子講德論。又以爲偃武修文之應。沈約宋書列於符瑞志。然南齊屢見白虎不爲瑞也。郝氏懿行曰。嘗疑說文有彪無虬。玉篇廣韻。彪虬互見。蓋篆文甘作目。與日形近而誤。衍也。證以釋文。彪字林下甘反。又亾狄反。亾狄卽彪字之音。可知彪衍爲虬。宜據以訂正。又按浚儀補注引鄭志詩釋文。淮南子意。以此白虎卽騶虞也。故云下闕黑文二字。然參考諸書。騶虞乃前央林曾耳。非此也。所

云尾長於身正見前說曾耳文內近閩縣陳編修壽祺亦以此白虎下闕黑文字非也

屠州黑豹

孔氏曰屠州狄之別名王氏補注曰晉史北狄有屠各山海經幽都山多玄虎玄豹散宜生得玄豹列女傳南山有玄豹霧雨七日而不下食欲以澤其毛而成文章也爾雅虺王氏自注式竹切黑虎注晉建平秭歸縣檻得之狀如小虎而黑毛深者爲斑

秋濤曰按屠州蓋卽休屠也匈奴傳有休屠王後地入於漢今甘肅涼州府一統志以爲卽休屠王地通典匈奴祭天處在雲陽甘泉山下秦擊奪其地後徙

王會篇箋釋

卷下

三

之休屠王右地故休屠有祭天金人像按涼州府鎮番縣之東北有休屠澤休屠國卽取是澤以爲名漢書地理志武威縣休屠澤在東北古文以爲豬野澤書禹貢原隰底績至于豬野卽此水經注武威北有休屠澤俗謂之西海其東有豬野澤俗謂之東海通謂之都野括地志姑臧縣有白亭軍因白亭海爲名太里元和郡縣志姑臧縣有白亭海因以爲名又東平寰宇記姑臧縣白亭海水色潔白因以爲名又東有達狄迴海行都司志白亭海一名小闕端海子五澗谷水流入此海卽豬野澤也按此澤俗名魚海子卽今涼州府武威縣東之三岔河下流自鎮番東北

出邊又三百餘里。瀦爲澤。方廣數十里。去涼州殆五百里。括地志云一百八十里。未合也。按豬都屠魚俱一聲之轉。休與州聲又相近。然則休屠之卽屠州。可參互而得矣。又按海內經。北海之內有山名曰幽都之山。黑水出焉。其上有立鳥。立蛇。立豹。立虎。立狐。蓬尾。有大玄之山。有立邱之民。郭注曰。言邱上人物盡黑也。又淮南子云。堯北撫幽都。高誘注曰。陰氣所聚。故曰都。今雁門以北是。秋濤按此黑水。以地理證之。當卽黑龍江也。其水所出。卽幽都山。今謂之肯特山。莊子云。流其工于幽都。蓋卽其地。屠州強盛之時。必兼有幽都之地。故以立豹爲貢。屠與都。州與幽。音亦皆相近。歲久而語音轉移也。

王會篇箋釋

卷下

四

禹氏駒駮

孔氏曰。禹氏西北戎夷駒駮馬之屬。王氏補注曰。管子曰。堯舜之王。北用禹氏之玉。注西北戎名。又曰。玉幣有七策。禹氏邊山之玉一策也。伊尹朝獻商書。正北以駒駮爲獻。山海經。北海內有獸狀如馬。名駒駮。色青。字林。北狄良馬也。一曰野馬。瑞應圖云。幽隱之獸也。有明王在位。卽至說文野馬之良也。王氏自注。史記匈奴奇畜則駒駮音陶塗。顏師古曰。出北海中。其狀如馬。非野馬也。

秋濤曰。按禹氏在西北。月氏亦在西北。漢以後。禹氏無聞。而月氏詳於史。禹月一聲之轉。禹氏蓋卽月氏。

也。氏音支。伊尹四方令云：正北月氏。又云：請令以騶駼爲獻。與此正合。史記匈奴傳略云：秦始皇時，東胡強而月氏盛。匈奴單于曰頭曼，使冒頓質於月氏。頭曼急擊月氏，月氏欲殺冒頓，冒頓亡歸，冒頓旣立，破滅東胡。西擊走月氏，漢文帝時，匈奴夷滅月氏，定樓蘭、烏孫、呼揭及其旁二十六國。漢書西域傳曰：大月氏本行國也，隨畜移徙，與匈奴同俗，控弦十餘萬，故彊輕匈奴。本居敦煌祁連閒，至冒頓單于攻破月氏，而老上單于殺月氏王，以其頭爲飲器。月氏乃遠去，過大宛，西擊大夏而臣之，遂都媯水北，爲王庭。其餘小眾不能去者，保南山，羌號小月氏。又曰：大月氏國

王會篇箋釋

卷下

五

治藍氏

史記作市

城郭注海內東經云：月支國多好馬，美

果，有大尾羊如驢尾，卽羶羊也。小月支天竺國皆附

庸云：按此皆月氏西徙以後之都邑風俗，非其舊也。

伊尹所云正北月氏，與海內東經所云國在流沙外

者，月支之國，則皆指未徙時言。又按史言月氏本居

敦煌祁連閒，括地志云：涼甘肅沙等州地，本月支國

一統志：沙州衛，古月支戎地，卽今敦煌縣也。是月氏

未徙以前地在流沙以內，而山海經以爲在流沙外

二說歧異。今按月氏本行國，不恆厥居，疑當夏商周

時，本在正北方流沙之外，迨周秦之際，乃度漠而南

居敦煌祁連閒，後爲匈奴所破，又復西徙，不足異矣。

爾雅釋畜有駒駝郝氏懿行曰郭注引海外北經以校今本無色青二字然史記徐廣注駒駝似馬而青與郭引合疑古本有之而今脫也據後義補注所見山海經尚有此二字畢尙書注海外北經曰駒駝疑卽橐駝也聲皆相近而古今注爾雅者皆未之及不敢定之秋濤按伊尹四方令正北以橐駝駒駝爲獻其爲二物明矣畢注誤也

大夏茲白牛

孔氏曰大夏西北戎茲白牛野獸也似白牛形一無此四字王氏補注曰伊尹朝獻商書正北大夏山海經國在流沙外者大夏史記大夏在大宛西南二千餘里

王會篇箋釋

卷下

六

管子桓公西伐大夏涉流沙

秋濤曰淮南墜形訓云西北方曰大夏郭注海內東經曰大夏國城方二三百里分爲數十國地和温宜五穀史記大宛傳云大夏在大宛西南二千餘里媯水南其俗土著有城屋與大宛同俗無大王長往往城邑置小長漢書西域傳曰大夏本無大君長城邑往往置小長民弱畏戰故月氏徙來皆臣畜之共稟漢使者又曰大月支國王治藍氏城去長安萬一千六百里不屬都護戶十萬口四十萬勝兵十萬人東至都護治所四千七百四十里西至安息四十九日行南與罽賓接土地風氣物類所有民俗錢貨與安

息同。出一封橐駝。按大月氏本在敦煌祁連間。後爲匈奴所破。西徙。過大宛。擊大夏而城之。都媯水北。爲王庭。此所紀大月氏之土壤物產。皆大夏之土壤物產。故具錄焉。瀛寰志略曰。媯水。卽阿母河。源分十數支。皆在雪山之北。蔥嶺之西。匯流之後。西北行約二千餘里。又北折行約千里。而入于鹹海。大月氏王庭。旣在媯水之北。則其部曲自在媯水左右。乃今布哈爾境土也。按志略又言。布哈爾亦回部大國。東接拔達克山諸部。北與浩罕接壤。幅員恢闊。東境多山嶺。西界有大戈壁。沙磧也。有城郭而兼游牧。以今考之。游牧者月氏餘風。城郭者大夏舊俗。是其爲月氏大夏。

王會篇箋釋

卷下

七

故壤灼然無疑。雖數千年之後。尙可溯其原委也。

犬戎文馬而赤鬣。縞身目若黃金。名吉。

本注一皇一作古

黃之乘

孔氏曰。犬戎。西戎之遠者也。王氏補注曰。山海經白

犬有牝牡。是爲犬戎。書傳文王伐犬夷。匈奴傳西伯

伐吠夷。

王氏自注。卽吠戎也。

隴以西有吠戎。山海經犬封國曰

犬戎。國狀如犬。有文馬。縞身朱鬣。目若黃金。名曰吉

量。

王氏自注。或作良。一作彊。

乘之。壽千歲。注六韜曰。文身朱鬣。眼

若黃金。項若雞尾。名曰雞斯之乘。書大傳。散宜生之

犬戎氏。取美馬。駁身朱鬣。雞目者。取九六焉。瑞應圖

騰黃神馬一名吉光。說文馬赤鬣。縞身目若黃金。名

曰馮吉皇之乘周文王時犬戎獻之

秋濤曰按犬戎在周爲肘腋之患以地勢最近豐鎬

故也孔氏以爲遠戎蓋因山海經有犬戎國狀如犬

知古書簡略所云狀如犬云者不過謂其雖野似獸非眞四足而毛也非是顧氏棟高

云犬戎西戎之別在中國者在今陝西鳳翔府境其

本國則今西甯府西北樹敦城是也史記匈奴傳周

西伯昌伐吠夷氏索隱曰韋昭云春秋以爲犬戎按

吠音犬大顏云卽昆夷也山海經云黃帝生苗龍苗

龍生融吾融吾生弄明弄明生白犬白犬有牝牡是

爲犬戎又山海經有人面獸身名曰犬夷賈逵曰犬

夷戎之別種也史記又曰周道衰而穆王伐犬戎得

王會篇箋釋

卷下

八

四白狼四白鹿以歸自是之後荒服不至周幽王用

寵姬褒姒之故與申侯有卻申侯怒而與犬戎共攻

殺周幽王于驪山之下又曰秦穆公得由余西戎八

國服于秦故自隴以西有緄戎正義曰音昆字當作

混顏師古云混犬夷也是名異實同皆卽王會之犬

戎也又按吉黃之馬文王時散宜生購諸犬戎以獻

紂至成王時犬戎又以爲貢是當時彼地產此神駿

不足爲異又案吉黃盧學士刻本作古黃校云古黃

說文作吉皇海內北經注引作吉黃此從舊本作古

黃與初學記所引亦合王懷祖先生讀書雜誌曰作

吉黃者是也王本作吉黃與說文山海經注合山海

經圖讚亦作吉黃文選東京賦注引瑞應圖云騰黃神馬一名吉光黃古同聲吉光卽吉黃也海內北經作吉量下字雖不同而上字亦作吉則作吉黃者是也藝文類聚祥瑞部下初學記獸部引此並作古黃乃類書相沿之誤不可從也又案海外西經奇肱之國其人一臂三目有陰有陽乘文馬郭注文馬卽吉良也則不獨犬戎有是馬矣畢尙書曰爾雅回毛在背闕廣疑闕廣吉量音相近此亦昔人所未論及者又按方以智通雅曰飛黃訾黃翠黃乘黃吉量古皇吉光吉黃一物也按漢書郊祀志訾黃封禪書翠黃注皆以爲乘黃淮南子飛黃服阜注乘飛黃者壽

王會篇箋釋

卷下

九

三千歲亦似指乘黃而言惟白民之乘黃與犬戎之吉黃並載王會形狀迥殊歷攷載籍無指爲一物者密之概合爲一未敢以爲然也

數楚每牛每牛者牛之小者也
孔氏曰數楚亦北戎也王氏補注曰爾雅注懼牛庠小今之櫻牛也又呼果下牛

秋濤曰按數楚蓋西戎非北戎也西山經數歷之山楚水出焉而南流注于渭水經注楚水出汧縣之數歷山南流注于渭闕駟以是水爲汧水焉畢尙書曰金史地理志鳳翔路號有楚山數歷與楚聲相近故水亦曰楚水也山當在今陝西隴州疑俗稱西泰山

在州東南百里者是也。楚水今出隴州西南東流逕西秦山南。又東至寶雞縣西入于渭。俗亦稱陸川。秋濤按據此則數厯山楚水。蓋卽數楚故壤矣。又按西山經黃山有獸焉其狀如牛而蒼黑大目其名曰犖。郭注音敏畢注曰犖非古字當爲每廣韻犖音切同美是也。引王會篇每牛爲證。秋濤按每犖一聲之轉。此篇云牛之小者山經所云亦牛之蒼黑者耳。蓋卽一物也。郭注云今始平槐里縣有黃山上故有宮漢惠帝所起疑非此畢注曰山未詳也。或說卽今陝西興平黃山斯錯簡耳。秋濤按每牛旣在黃山數厯山又在黃山附近之地則黃山在興平無疑數厯之卽

王會篇箋釋

卷下

十

爲數楚亦無疑。王會列數楚與犬戎相次。犬戎在西則數楚亦在西。是皆炳然可據者。以數千年不知所在之處。一旦豁然誠快事也。又按爾雅犖牛釋文犖音碑。郭注犖牛庫小今之犖釋文子息反本或作稷。牛也。又呼果下

牛出廣州高涼郡邵氏晉涵曰犖牛卽每牛也。王會云每牛者牛之小者也。犖每聲之轉。

匈奴狡犬狡犬者巨身四足果皆北嚮四足一作四尺。當作皆南嚮以下文南方諸國皆北嚮推。之可知。若均北嚮則此句不必復出矣。

孔氏曰匈奴字衍。北戎也。王氏補注曰伊尹朝獻

商書正北匈奴。晉灼曰堯時曰葷粥。周曰獫狁。秦曰匈奴。通典云山海經已有匈奴。爾雅疏五狄三曰匈奴。

奴說文狡少狗也匈奴有狡犬巨口而黑身

秋濤曰按葦粥獫狁匈奴三名並一聲之轉事迹詳見各史列傳海內南經匈奴開題之國列人之國並在西北郭注匈奴一曰獫狁畢尙書曰穆天子傳有曹奴疑亦此曹奴音相近史記匈奴傳曰其先祖夏后氏之苗裔也曰淳維索隱云張晏曰淳維以殷時奔北邊又樂彥括地譜云夏桀無道湯放之鳴條三年而死其子獯粥避居北野隨畜移徙中國謂之匈奴其言夏后苗裔或當然也今按伊尹四方令匈奴在商初早爲建國又山海經已有匈奴則夏以前匈奴久著于北方矣似晉灼所言較爲近是或古有匈奴部落淳維奔其國因爲君長若箕子之於朝鮮未可知也孟子云太王事獯鬻又云昔者太王居邠狄人侵之事之以皮幣云云趙注交鄰章云獯鬻北狄强者今匈奴也太王去邠避獯鬻是獯鬻卽狄也吳越春秋太伯傳云古公爲狄人所慕薰鬻戎妬而伐之據其所言似狄與獯鬻爲二種周氏廣業曰吳越春秋後漢趙氏所撰蓋刺取史記說苑諸書爲之其書視諸說最後而獯鬻妬狄之說前此無之未足爲據也又按西山經玉山西王母所居有獸狀如犬而豹文其角如牛其名曰狡其音如吠犬見則其國大穰按王會所稱狡犬形狀略同疑卽一物其角如牛

似當作其大如牛卽巨身之謂也梁曜北曰四足果蓋足短之稱若果下牛果下馬矣王懷祖先生讀書雜志曰案古無謂短爲果者果下馬謂馬高三尺乘之可於果樹下行耳見魏志東夷傳注非謂短爲果也而以四足果爲四足短可乎予謂果疑卽裸字周官龜人東龜曰果屬釋文果魯火反魯火正切裸字是果與裸同音袒裻裸程之裸亦通作果范望注太玄玄數曰裸謂無鱗甲毛羽然則四足果者四足無毛之謂

歟

權扶玉目

秋濤按一本作三日誤

孔氏曰權扶南蠻也玉之有光明者形小也一本奪此注但

王會篇箋釋

卷下

七

存形甚小三字王氏補注曰周禮注相玉書曰珽玉六寸明

自照

秋濤曰孔氏不言權扶所在今按權扶蓋山名在今漳州府海澄縣北與泉州府同安縣接界世謂之文圃山權與文扶與圃均一聲之轉也其山四面圓秀一名十八面山權扶國蓋以山爲名玉目卽今之所謂水晶漳郡所產故以爲貢方以智通雅曰水晶閩中極多有五色一統志云漳州之梁山大帽山俱出水晶有地名水晶坪按水晶本名水精取其瑩澈晶光猶人之目中瞳人謂之目精也其質乃玉類又有黑白二色故有玉目之名山海經謂之水玉廣雅謂

之石英。格古要論云。水晶性堅而脆。刀刮不動。色白如冰。清明而瑩。無纖毫瑕玷。擊痕者爲佳。按古人或謂千年冰化爲水晶。然水晶自是石中所產。非關冰化也。又按海南諸國有扶南。自吳晉時始著。或疑卽權扶。今按通典云。扶南國在日南郡之南海西大島。中去日南可七千里。在林邑西南三千餘里。國俗本裸。不制衣裳云云。是扶南卽白民裸國之類。在西南海中。王會此文連舉禽人路人長沙各國。皆近在楚越東南方。忽及扶南。則非其次。且古蠻王本有以扶爲氏者。一統志湖南長沙府安化縣東七十里飛霜崖絕壁上有扶氏墓相傳蠻王扶氏葬此又唐費州在今貴州思南府安化縣東南一百里扶陽縣有扶水。然則

王會篇箋釋

卷下

三

扶南蓋以在扶之南爲名。非卽權扶也。至長沙僅有扶氏。不聞其地有扶名。殆蠻之後裔流徙所居。不足爲異。思南雖有扶水。而地不產玉。惟漳郡地名旣諧。而所出水玉。又與王會相合。方域物產。確有可據。不得移而他屬矣。又按通雅云。似珠而大者曰玉目。引王會注。玉目。寶玉似大珠者也。按諸本孔注與方氏所引不同。疑密之所見。別一本也。然玉似大珠。則光明洞徹。亦非水晶不足以當之。

白州比閩比閩者其華若羽伐其木以爲車終行不敗

比閩一作北閩秋濤按華當作葉說見後

孔氏曰白州東南蠻與白民接也水中可居曰洲洲

中出此珍木。水中可居以下一本奪去王氏補注曰爾雅疏戎類有老白廣志櫻一名并閩葉似車輪比閩疑亦并閩之類。

秋濤曰按白州孔氏以爲東南蠻不言所在今按福

建延平府有柘欄山柘閩極多疑其地卽白州也。

志柘欄山在延平府永安縣北二十里生雲吐霧隱見無時草木蒙茸冬夏一色多產柘欄木故名九域

志南劍州有柘欄山上有徑曰走馬埭諸峯攷延平府南平縣

有仙洲介于二水之間少南又有黃龍洲又蒙洲在

縣東北五十里又沙縣治東對岸有山洲一名崇安

洲溪旁三面皆阻水唐時崇安鎮置于此又有大洲

在沙縣治西南溪中亦名長洲一名蚪洲以形若潛

王會篇箋釋 卷下

西

蚪出水也。舊長數百丈。溪水至此中分。有居民千餘家。後洲漸落。猶長二三十丈。土人謂之金沙墩。溪之上流多險巇。至此則稍平緩。又將樂縣有白水澗。在縣南六十里。一水自高崖而下。可百餘丈。望之如白虹。合而論之。延平在諸水之間。本有洲名。其水又有白水之名。故古謂之白州。比閩卽并閩。比并一聲之轉。西山經石脆之山。本草引作石翠之山其木多櫻柘。郭璞注。櫻樹高三丈許。無枝條。葉大而員。枝生梢頭。實皮相裹。上行一皮者爲一節。可以爲繩。一名柘欄。文選西京賦注。引郭注作并閩。說文云。櫻柘欄也。可作草。草雨衣也。按此木今所在園林中有之。鄉人剝取櫻皮。

以覆屋。雨水漸漬。不爲損壞。故可以作雨衣。本草拾遺云。其皮作繩入水。千年不爛。皆與王會所紀爲車終行不敗之說合。又宋嘉祐本草云。櫻欄木高一二丈。無枝條。葉大而圓。有如車輪。萃于樹杪。此卽王會所云其葉若羽。言如鳥羽之在樹杪也。今本葉作華。傳寫之誤耳。又按酉陽雜俎云。白州比閩華。其華若羽。伐其木爲薪。終日火不敗。按段柯古此說。他無所經見。蓋誤記王會之詞也。

禽人菅

秋濤按太平御覽九百九十六卷引此作會人獻以菅注云會或作禽

孔氏曰亦東南蠻菅草堅忍

秋濤按太平御覽引王作堅刃刃卽韌字

氏補注曰爾雅白華野菅注茅屬陸璣疏菅似茅其

王會篇箋釋

卷下

五

根下有白粉柔韌宜爲索

秋濤曰。禽人不知所在。按今湖南寶慶府新甯縣。爲漢零陵郡地。新甯舊治在今縣東二里金城村。金禽聲相近。疑卽古禽人國也。菅蓋卽異物志之香菅。吳錄謂之香茅者也。實零陵所產。故禽人以爲貢焉。異物志曰。香菅似茅。而葉長大於茅。不生洿下之地。邱陵山岡。凡所蒸享。必得此菅苞裹。助調五味。益其芬菲。吳錄地理志曰。零陵泉陵有香茅。古貢之縮酒。按書禹貢。荊州厥貢包匭菁茅。傳曰。茅以縮酒。孔疏曰。郊特牲云。縮酒用茅。明酌也。特令此州貢茅。茅當異於他處。左傳齊謂楚曰。爾貢苞茅不入。王祭不供。無

以縮酒。寡人是徵。盛弘之荊州記曰：零陵郡有香茅。桓公所以責楚。胡朮明曰：按水經注云：晉書地道志曰：泉陵縣有香茅。氣甚芳香。言貢之以縮酒。蓋此茅潔且芳。異於他處所產。宜縮祭祀之酒。故特令包匭而貢之。又曰：案菁茅菁菁然華盛而氣更芬芳。貢之者欲其色香不變。故包而加之以匭。包在內。匭在外也。一統志：永州府土產香茅。卽此。茅氏匯疏曰：蠻溪叢笑云：麻陽包茅山。茅生三脊。又云：今辰常並出。靖州亦多有之。胡氏曰：湖南產茅處雖多。終當以泉陵之香茅爲正。泉陵今永州府治零陵縣。及所領祁陽縣。皆其地也。合觀諸說。則禽人之菅。自三代以來。重王會篇箋釋

卷下

夫

之矣。又按縮酒之說。有二解。周禮甸師祭祀共蕭茅。鄭司農云：蕭字或爲茜。茜讀爲縮。束茅立之祭前。沃酒其上。酒滲下去。若神飲之。故謂之縮。杜注左傳用其說。魏華父云：古無灌茅之義。所謂縮酒。只是醴有糟。故縮於茅以清之。若曰滲下去。如神飲。此臆說也。胡氏曰：案周禮司尊彝曰：醴齊縮酌。注云：以茅縮去滓也。解縮字甚明。仍不用先鄭祭前沃酒之說。

路人大竹

孔氏曰：路人東南

一作東方

蠻貢大竹。王氏補注曰：鄭語

北有路洛泉。徐蒲注皆赤翟隗。姓春秋赤狄潞氏。王氏自注今潞州潞城縣山海經長石山之西有共谷。其中多竹。衛

邱之山竹林在焉大可爲舟岳山尋竹生焉王氏自注大竹也

秋濤曰自權扶以下俱南方之國孔氏云路人東南蠻是也浚儀引北方赤翟之路證之非矣方氏亦云注路爲赤

狄恐在北方無此大竹也按元和姓纂云露氏露伯夏殷侯國也

子孫以國爲氏焉露氏譜越王句踐七代孫闔君搖漢封東甌王搖別封其子爲露余侯因氏焉二說不同今按路露駱古字並通夏殷露伯卽周初路人蓋越之支而封於閩地者也路人在東南閩地亦在東南攷其方域正爲密合史言閩越東甌姓駱氏後子孫又姓露氏皆原於此露氏譜不能言其初故第及

王會篇箋釋 卷下

七

露余侯耳今福建汀州府武平縣東北有露溪一溪七灣俗呼露溪七渡引流而東亦曰大順嶺溪又北入長汀縣界下流入汀水至廣東潮州府入海汀潮皆古閩越露溪當卽故路人國地也又按史記東越傳云閩越王無諸及越東海王搖者其先皆越王句踐之後也姓騶氏徐廣曰騶一作駱索隱曰徐廣說是上云甌駱此別云閩不姓騶也世皆疑句踐之後何以不姓姒而姓駱昔人亦無言其故者今按姒爲夏后之姓駱則以國爲氏猶齊陳氏之後不姓媯而姓田楚國之後不姓芊而姓昭屈景古人類多如此不足爲異統前後而論之蓋在夏殷爲露伯國在周

初爲路人國。及周末。地入於越。句踐封其支庶於此。秦取其地爲閩中郡。越之子孫失國。因以國爲氏。而姓駱。及漢興。復封閩越東甌二國。無諸與搖皆駱氏。而搖之子又別爲露氏。蓋其源委如此。此皆東南之地。在南越之東者也。若南越之西。別有西甌駱。疑其亦駱氏別種。分王於彼者。而壤土處蒼梧之西南。與王會之路人。不可溷爲一地矣。史記南越傳載趙佗夷中間其東閩越千人眾號稱王其西甌駱裸國亦稱王是閩越在東駱越在西確有明證漢滅南越時越桂林監居翁翁甌駱屬漢皆得爲侯蓋甌駱在廣西與桂林近故得而通典云貴州古西甌駱越之地唐貴州在今廣西潯州府貴縣南卽其地也又南越傳云閩越西甌駱役屬焉漢書音義曰駱越也索隱曰姚氏案廣州記云交阯有駱田仰湖水上下人食其田名爲駱侯諸縣自名爲駱將銅印青綬卽

王會篇箋釋

卷下

文

今之後南越王佗攻破安陽王令二使典主交阯九溪縣後南越王佗攻破安陽王令二使典主交阯九真二郡卽甌駱也是交阯九真亦爲駱越其地益在西南矣總之東甌閩越本姓駱氏與西甌駱越實同一種類而建國之地則相距數千里猶東甌西甌舊鄭新鄭不可不詳爲區別王會之路人實在東不在西也若交州記言駱越因駱田以命名不知駱之有國已肇始于夏殷之時駱田之名猶爲後起矣云

大竹者其竹之大異於常竹也。一統志載汀郡土產如竹鎖竹絲器及紙之類皆竹所爲。故成王時以大竹充貢。方以智通雅云員邱卽路人竹。按方氏所云路人竹直指大竹。言非眞員邱竹一名路人竹也。考載籍言大竹不一。神異經之太極竹。長百餘丈。南涕竹。南方荒中有。皆荒渺無稽。華陽國志濞竹。夷其節。相去一丈。南方草木狀之由梧竹。出交阯長三四丈。雲母竹。一節爲船。

出扶山海經之衛邱山竹經云衛邱山南帝俊竹林在焉大可爲舟注俊音舜

舜林中竹一節則可爲舟大抵出自遐荒距路人地遙遠惟異物

志云篔簹竹生水邊長數丈圍一尺五六寸一節相

去六七尺或去一丈廬陵界有之今江西吉安府又異苑云

建安有篔簹竹今福建甯甯府又南越志云羅浮山第三十

一嶺半是巨竹皆七八圍長一二丈有三十九節葉

若芭蕉謂之龍鍾竹常有鸞鳳棲宿其上羅浮山在今廣東惠

州此三處大竹與路人相近任土作貢有由然矣

長沙鼈

孔氏曰特大而美故貢也王氏補注曰湘川記秦分

黔中以南長沙鄉爲長沙郡

王會篇箋釋

卷下

九

秋濤曰按通典云長沙郡潭州古三苗國之地自春

秋以來爲黔中地楚國之南境秦爲長沙郡有萬里

沙祠故曰長沙漢爲長沙國後漢復爲長沙郡晉因

之宋長沙國兼置湘州齊因之又爲長沙郡湖川之

奧人豐土闢南通嶺嶠脣齒荆雍亦爲重鎮一統志

云隋平陳廢郡改州曰潭州大業初復改爲長沙郡

唐曰潭州曰長沙郡宋仍曰潭州長沙郡元天歷二

年升爲天臨路明初改潭州府洪武五年又改長沙

府國朝因之今按王會所紀則成周之初長沙自

爲一國厥後乃地入于楚通典於三苗國後未及此

蓋偶未檢周書也摭言云沅江鼈甲九肋者稀沅江

下流入洞庭與長沙相近蓋其鼈之種類有異故以爲獻矣。秋濤又按自權扶以下九國皆南方之國而權扶至長沙五國列于東蓋南方臺正東也明其爲東南之國也魚復至南人四國次于其西蓋南方臺正西也明其爲西南之國也長沙禽人在嶺之北而附于東南蠻揚南人在嶺之南而附于西南此或因其風俗部落之相似而次之亦猶東胡與匈奴接壤而一附東北一附西北不相溷也王會之殺列以序不相雜廁也如此

其西魚復鼓鐘鐘牛

孔氏曰次西列也

一本奪此注

魚復南蠻國貢鼓及鐘而

王會篇箋釋

卷下

三

似牛形者美遠致也王氏補注曰左傳魚人注魚復

王氏自注音腹

今巴東永安縣

王氏自注今夔州奉節縣

十道志夔州春

秋時魚國漢爲巴郡魚復縣鐘牛未詳

秋濤曰按左傳文十六年庸人率羣蠻叛楚楚人伐庸七遇皆北唯裨儵魚人實逐之杜注魚庸邑卽魚

復據王會則周初魚復本自爲國春秋時地始屬庸

也一統志魚復故城在今四川夔州府奉節縣東北漢置魚復縣其後移治白帝城而此城廢舊唐書地理志曰漢魚復縣今奉節縣北三里赤甲城是也水

經注曰赤岬城公孫述所造因山據勢周迴七里一

百四十步東高二百丈西北高一千丈南基連白帝

山按漢昭烈帝章武二年改魚復曰永安晉太康元年復曰魚復宋齊梁因之西魏改曰人復唐貞觀二十三年改曰奉節今縣卽因其名也

蠻揚之翟

孔氏曰揚州之蠻貢翟鳥王氏補注曰禹貢揚州有嶠夷翟雉名徐州羽畎夏翟左傳注南方曰翟雉爾雅鶴山雉注長尾者疏云今俗呼山雞王叔之翟雉賦雉見質而不陋翟表文而不華

秋濤曰按此蠻揚與蒼梧相次地當相近以其地屬揚州而國名蠻揚猶徐州之境有徐夷之國荊州之境有荊楚之國皆以州名國亦其例也史記秦并天

王會篇箋釋

卷下

三

下略定揚越張晏曰揚州之南越也索隱曰案戰國策云吳起爲楚收揚越正義曰夏禹九州本屬揚州故云揚越案史所云揚越乃百越之總名今廣東廣西及交阯占城之地皆是揚越本一聲之轉故交廣爲越地卽爲揚地漢魏諸儒皆以交廣屬揚州據此也然揚越指全粵而言其地廣王會之蠻揚則指一國而言其地隘攷史記南越傳載趙佗移檄告橫浦陽山湟谿關姚氏注云地理志桂陽有陽山縣今此縣上流百餘里有騎田嶺當是陽山關按此是秦已有陽山蓋沿周時舊名蠻揚疑卽陽山也西漢亦以陽山爲侯國在今廣東連州陽山縣東卽其地矣或

曰成王時越裳貢白雉。見于典籍。不一而足。而王會不載。以音類求之。疑蠻揚卽越裳也。蓋越裳在交阯西南。故謂之蠻越。揚越聲轉字通。故亦書爲蠻揚。翟卽白雉也。按此說恐未確。姑存以備攷。王懷祖先生讀書雜志以揚當作楊。从木不从手。當從之。按索隱本揚皆作楊。尙存古字。雜志又曰蠻楊本作楊蠻。故孔注曰楊州之蠻貢翟鳥。今本楊蠻二字倒轉。則義不可通。且與注不合。上文之良夷山戎。若倒言之。則曰夷良戎山。其可乎。楊蠻之誤爲蠻楊。猶詩荆蠻之誤爲蠻荆。段氏詩經小學已辨之。今按王先生說非是。此蠻揚猶言蠻越。是國名。非州名。猶於越及于越。東越皆當以越字在下也。與良夷山戎命名之義本殊。合而論之。是望文生義未爲得矣。

王會篇箋釋

卷下

三

倉吾翡翠。翡翠者所以取羽。

孔氏曰倉吾亦蠻也。翠羽其色。

一本無此字。

青而有黃也。

王氏補注曰山海經南方蒼梧之邱。禮記注蒼梧於

周南越之地。楚吳起南并蠻越。遂有蒼梧。漢有蒼梧。

王趙光後平南粵。以其地爲蒼梧郡。

王氏自注今梧

靜江德慶肇慶府之地。

爾雅翠鷓注似燕紺色。生鬱林。伊尹朝

獻商書。正南翠羽異物。志曰翠鳥似鷺。翡赤而翠青。

其羽可以爲飾。交州記翡翠出九真頭黑腹下赤青。

縹色似鷓鴣。

秋濤曰倉與蒼吾與梧古字通用今梧州卽宋梧州桂林

宋靜江府平樂宋昭平州肇慶宋慶府四府及德慶宋德慶府封川宋封州

賀宋賀州藤宋藤州平南宋龔州等州縣皆漢蒼梧郡地其

地古多梧樹嶺南異物志曰南人以梧為蒼梧故以

名郡是也禮檀弓舜葬于蒼梧之野海內南經曰蒼

梧之山帝舜葬于陽帝丹朱葬于陰海內經南方蒼

梧之邱蒼梧之淵其中有九疑山舜之所葬在長沙

零陵界中郭注曰山在今零陵營道縣南疑古者總

名其地為蒼梧也按此是古時蒼梧地廣今湖南永

州府界亦其地也史記載舜南巡狩崩于蒼梧之野

說與檀弓山海經合與孟子異蒼梧在周初為荒服

王會篇箋釋

卷下

重

國戰國時屬楚蘇秦說楚威王南有洞庭蒼梧卽此

漢以蒼梧郡為交阯刺史治所明代兩廣總督亦多

駐梧州蓋地為百粵襟喉故重其權以資控制也王

逸注楚詞招魂云雄曰翡雌曰翠李善注鶴鷄賦引

異物志曰翡赤色大於翠劉逵注蜀都賦云翡翠常

以二月九月羣翔又注吳都賦云翡翠巢於樹巔生

子夷人稍徙下其巢子大未飛便取之皆出于交阯

鬱林南禹貢揚州貢齒革羽毛傳曰羽鳥羽正義曰

翡翠孔雀之屬漢趙佗獻帝亦以翠鳥生翠蓋炎州

珍異自古尚之矣

南人致眾者皆北嚮秋濤按此節原在其餘皆可自古之政下今移于此致一作至眾

當作象
說見後

孔氏曰南人南越王氏補注曰歷代史皆云五嶺之南至于海並禹貢揚州之地故云揚粵朱子曰山海經記諸異物飛走之類多云東向或云東首皆爲一定不易之形疑本依圖畫而爲之古人有圖畫之學如九歌天問皆其類愚謂此篇亦然秋濤按此篇與同所記東夷西嚮西戎東嚮北狄南嚮南蠻北嚮皆與明堂位合是記當時朝位非出于圖畫也後儀之論似是而非故附辨于此鄭康成注禮許叔重說文皆稽以爲證蓋周書著錄于劉略班志非晉時始出繫之汲冢失其本矣閱覽洽聞之士如郭景純王元長援述者不一宜與禹貢職方並傳敘事之祖也若禹四海異物

王會篇箋釋

卷下

五

載於大傳湯四方獻令附於王會合而觀之三代之典粲然矣

秋濤曰南人致眾義無所取眾當作象字形相近故譌此言南越之國以象爲貢也南越地最廣遠其都會則今廣東廣州府番禺縣是說文象長鼻牙南越大獸三年一乳南州異物志曰象之爲獸形體特詭身倍數牛目不逾豕鼻爲口役望頭若尾馴良承教聽言則跪素牙玉潔載籍所美服重致遠行如邱徒嶺表錄異曰廣之屬郡潮州今潮州府循州今嘉州府多野象牙小而紅宋莘視聽鈔曰鄭文振潮陽人言象爲南方之患土人苦之不問蔬穀守之稍不至踐食之立盡

性耆酒。聞酒香。輒破屋壁入飲之。人皆於其來處架高木。若望火樓然。常有人直象獨畏煙火。先用長竿接茅把於其杪。望見其來。共然火把。持竿以指之。卽去。隨之三四里方敢回。羣行者猶庶幾。其獨行者最喜傷人。蓋勢孤。恐人害之也。土人以巨木設機壓之。自潮陽來。必經由夔江嶺。此處最多。先使人行前探之。或遇其大羣。有候數日不去。不敢行者。監司巡歷。則保甲鳴鑼鼓趕逐之。頑然若無聞也。必俟其自散去。乃敢過。按廣潮等處。宋時尙多象。爲害如是。今則絕少此物。蓋戶口益眾。則山箐闢而異類遠去也。

秋濤又按此節本在其餘皆可自上古之政下。今按

王會篇箋釋

卷下

五

王會於四方之國各敘其貢物朝位。此文南人致象與上魚復蠻揚倉吾相接。並南方之國也。故云皆北嚮。今本誤次于後。則文義不相連貫。蓋錯簡也。今移正。

其餘皆可自上古之政。秋濤按此節本在倉吾翡翠節之下。南人致象節之上。今考正此移。

孔氏曰餘謂眾諸侯貢物也。言政化之所致也。王氏

補注曰書旅獒曰明王慎德四夷咸賓無有遠邇畢

獻方物惟服食器用而此篇諸方致貢無所不有。蓋

遠人來慕以其寶摯而不寶遠物以庶邦惟正之供

乃成王之心也。

王氏自注明堂位九夷八蠻六戎五狄職方氏四夷八蠻七閩九貉五戎

六狄鄭注云周之所服國數也

秋濤曰。按王會止記要荒諸國所貢之物。而於侯甸采衛所貢。皆未及焉。故舉其大凡。言眾諸侯貢物。皆不異於古也。按禹貢荊州貢菁茅。而周亦貢苞茅於楚。以此推之。是九州方物。任土作貢。周因于殷。殷因于夏。無所更革。故云可知自古之政也。

禹四海異物。秋濤按此浚儀王氏標題今因之。

夏成五服外薄四海

鄭氏玄注曰言德一作都廣之所及。王氏補注曰五服甸侯綏要荒薄迫也。九州之外迫於四海。

秋濤曰堯典云光被四表。鄭注曰言堯德光耀及四

王會篇箋釋 卷下

美

海之外益稷云外薄四海咸建五長。禹貢云東漸于海。西被于流沙。朔南暨聲教訖于四海。此言唐虞夏所服四海也。商頌玄鳥云肇域彼四海。四海來假。鄭箋假至也。天下既蒙王之政令。皆得其所。而來朝覲。貢獻。此言商所服四海也。蓼蕭詩序云澤及四海也。孔疏謂時王恩澤被及四海之國。使四海無侵伐之憂。得風雨之節。立政云至于海表。罔有不服。孔疏云四海之表。無有不服。王之化者。此言周所服四海也。以上參用邵氏晉涵之說。爾雅云九夷八狄七戎六蠻。謂之四海。顧氏炎武曰禹貢之言海有二。東漸于海。實言之海也。聲教訖于四海。槩言之海也。秋濤按九州之外。謂

之四海此通義也。禹時東南二海皆在版圖之內，其西北二海雖九州之外，而聲教洋溢，凡有血氣莫不尊親。故云外薄四海。

東海魚須魚目

鄭氏曰：所貢物魚須，今以爲簪。又魚目，今以雜珠。王氏補注曰：子虛賦：靡魚須之橈旃。注：大魚之須出東海。見尙書大傳雜書曰：秦失金鏡魚目入珠。

秋濤曰：禹貢海岱，惟青州海岱及淮，惟徐州淮海。惟揚州。凡三州言海。青徐海在東揚州，則海在東及南。又冀兗之東北亦濱東海，而禹貢未言以他州推之。可知也。禮記笏大夫以魚須文竹，鄭注曰：文猶飾也。

王會篇箋釋

卷下

毛

大夫士飾竹以爲笏。釋文曰：崔云用文竹及魚班也。隱義曰：以魚須飾文竹之邊。須音班。正義曰：庾氏云：以鮫魚須飾竹以成文。盧云：以魚須及文竹爲笏。非鄭義也。王懷祖先生曰：須與班聲不相近。此節經文及釋文正義內須字皆頒字之誤。頒與班古字通。故釋文音班。崔氏曰：用文竹及魚班也。說文：鮫海魚也。皮可飾刀。郭璞注：中山經曰：鮫魚皮有珠文而堅。可飾刀劍口。然則鮫魚皮有班，可以爲飾。故大夫用之以飾笏也。若魚須非所以飾笏，且不聞有文彩，不得言以魚須文竹矣。自唐石經始誤頒爲須，而集韻二十七刪內遂收入須字。音逋還切。引禮記大夫以魚

須文竹。而類篇以下諸書，並沿其誤矣。應鏞吳澄陳澹須字，皆如字讀，謂大夫以魚須飾竹，皆由不知頌之誤爲須，故不得其解而妄爲之辭。秋濤按禮記之魚須，羣經音辨云音班，用崔氏庾氏及隱義之說云。又如字則用盧氏之說，蓋崔庾以須爲班，則魚須卽大傳南海之魚革也。盧分魚須與文竹爲二，則魚須卽大傳東海之魚須也。二說不同，未可執一。且魚須旣可以飾旃柄，張揖注子虛賦曰：以魚須爲旃柄。何不可以飾笏旣以爲飾，則必有文采矣。鄭注禮記未嘗破須爲頌，則仍是言以魚須飾竹，與應吳諸家說合。必謂元本作頌而強鄭以從崔庾，未敢以爲然也。魏武四時食制

王會篇箋釋

卷下

天

云東海有大魚如山，長五六里，謂之鯨鯢。次有如屋者，時死海上，膏流九頃，其鬚長二丈，廣三尺，厚六寸。瞳子如三升椀。唐書開元七年，大拂涅靺鞨獻鯨鯢，睛述異記曰：南海有明珠，卽鯨魚目，瞳可以鑒，俗謂之夜光博物要覽云：日本國產如意寶珠，青色大如雞卵，光彩四射，云是鯨魚目睛。

南海魚革珠璣大貝

鄭氏曰：魚革，今以飾小車，纏兵室之口，貝古以爲貨。王莽時亦然。王氏補注曰：璣珠不圓也。禹貢荊州厥篚璣，大傳曰：散宜生得大貝如車渠。爾雅大貝曰蚌。說文鮘大貝也。王氏自注音岡詩象弭魚服，注魚服魚皮也。

草木疏魚獸似豬東海有之其皮背上班文腹下純青爲弓鞭矢服海潮及天將雨其毛皆起

秋濤曰左傳楚子曰寡人處南海時楚地未至南海特侈言之爾詩言至于南海呂氏以爲極其遠而言之按王會載南人致象注以爲南越則周成王時南海之國固已服屬矣禹貢導黑水入于南海此則實指南海而言大禹固親歷其地也南海後世謂之漲海秦置南海郡治番禺蓋自揭揚以西南至象郡皆南海也通典曰海南諸國漢時通焉大抵在交州南及西南居大海中洲上相去或五三百里五三千里遠者二三萬里乘船舉帆道里不可詳知外國諸書

王會篇箋釋

卷下

无

雖言里數又非盡實也其西與諸胡國接元鼎中遣伏波將軍路博德開百越置日南郡其徼外諸國自武帝以來皆獻見後漢桓帝時大秦天竺皆由此道貢獻及吳孫權遣宣化從事朱應中郎康泰使諸國其所經及傳聞則有百數十國因立記傳晉代通中國者蓋尠及宋齊至者有十餘國自梁武隋煬諸國使至踰于前代大唐貞觀以後又多于梁隋焉又按魚服之魚多解爲獸今按魏志東夷傳濊國海出班魚皮卽說文所云魴魚出葦邪頭國者也魴班聲相近故班魚謂之魴魚又說文山海經注並云鮫魚可飾刀鮫一名沙魚一名文魚是皆魚革之可用者則

詩所云魚服未可以魚獸概之也禮玉藻魚須一本
作魚頰注家釋爲魚班卽此魚革也說己見前交州
記曰鮫魚出合浦背上有甲珠文堅彊可以飾刀口
又可以鑣物按交阯合浦正南海地也又按書顧命
大貝鼗鼓在西房鄭氏注亦引書傳散宜生之江淮
之浦取大貝如車渠爲磴車渠車輞也鄭注大傳郭
注爾雅並同
按古云大貝如車渠而後世遂以車渠爲大貝之名
博物要覽云車渠海中大貝也背上壘文如車輪之
渠故名又云大者長二三尺闊尺許厚二三寸殼外
溝壟如蚶殼而深大皆縱文如瓦溝無橫紋也殼內
白皙如玉亦不甚貴番人以飾器物謬言爲玉石之

王會篇箋釋

卷下

辛

類

西海魚骨魚幹魚脅

鄭氏曰魚幹魚脅未聞

秋濤曰漢書西域傳屬賓西南與烏弋山離接烏弋
山離西與犁靬條支接行可百餘日乃至條支國臨
西海渡海乃通大秦卽犁靬也後漢書言甘英抵條
支而歷安息臨西海以望大秦距玉門陽關四萬餘
里西海之遠如此按西海自西域傳始知其地自明
神宗時大西洋利瑪竇等入中國始盛傳其方域國
土一統志曰瑪竇有萬國全圖其大略言天下有五
大州第一曰亞細亞州第二曰歐邏巴州第三曰利

未亞州第四曰亞墨利加州最後得墨瓦蠟泥加州
爲第五而域中大地盡矣其所謂亞細亞州者自中
國以至日本交阯西域等國皆是也其所謂歐邏巴
州者則南至地中海北至青地及冰海東至大乃河
墨河的湖大海西至大西洋其七十餘國卽瑪竇等
所生之本國也其所謂利未亞州者南至大浪山北
至地中海東至西紅海聖老楞佐島西至阿則亞諾
海大小其百餘國其所謂亞墨利加州者地分南北
中有一峽相連峽南曰南亞墨利加南起墨瓦蠟泥
海峽北至加納達峽北曰北亞墨利加南起加納達
北至冰海東盡福島地最廣大其所謂墨瓦蠟泥加

王會篇箋釋

卷下

三

者因以西把尼亞國王念地爲圖體徂西自可達東
乃命其臣墨瓦蘭者往訪沿亞墨利加東偏展轉經
年忽得海峽互千餘里海南大地杳無涯際以墨瓦
蘭首開此區遂卽其名命曰墨瓦蠟泥加云按西人
論地理者遞相祖述近儒加以考訂各成卷帙今錄
此以見其概云魚骨魚幹魚膂者按北史載一魚骨
有孔中通馬騎出入劇談錄云李德裕有巨魚膂骨
一條長二丈五尺其上刻云會昌二年海州送到太
平寰宇記云有人於林邑海嶼上得鯨頭骨大如數
百斛困事林廣記云大食勿拔國每歲常有大魚死
飄近岸身長十餘丈高二丈餘國人不食但剝其膏

爲油肋骨作屋桁脊骨作門扇骨節可爲曰海槎餘錄云秋晚巡行昌化屬邑俄海洋煙水騰沸二大魚約長數丈餘土人曰此番車魚也今中州藥肆懸大魚骨如杵曰者乃其脊骨也五雜俎云海洋一巨魚肉中刺骨亦長丈餘按諸書但言魚骨魚脇不言魚幹攻爾雅釋畜在幹第方郭璞注幹脇也公羊傳莊元年注亦云幹脇也儀禮少牢篇注以幹爲正脇特牲篇注以幹爲長脇然則魚幹卽魚之正脅或長脇耳蓋三者皆可爲器用故致之也

北海魚劍魚石出瑱擊閭

王會篇箋釋

卷下

三

凝膏在水上擊閭狀如鮐魚大五六尺今海家謂之本注闕王氏補注曰鰓魚石首也出南海頭中有石二字集韻劍俗作劔非是南州異物志鰐齒如刀鋸

秋濤曰按漢書言匈奴乃徙蘇武北海上蓋卽鄂羅斯之白哈兒湖非眞海也唐書言骨利幹國處瀚海北其地北距海又北度海則晝長夜短又流鬼國去京師萬五千里濱于北海是北海視西海較近也一統志曰鄂羅斯在喀爾喀楚庫河以北東南至格爾必齊河北岸自大興安嶺之陰以東至海與黑龍江所轄北境接界西接西洋西南至土爾古特國及準噶爾界北至海去中國二萬餘里此則北海之境確

有可攷者也。任昉述異記曰：海魚千歲爲劍魚，臨海異物志曰：海內有大魚長十餘丈，背負鋸船觸之皆斷。坤輿外紀曰：劍魚嘴長丈餘，鋸刻如鋸，能與把勒亞魚戰而勝。此皆所謂魚兵如劍者也。魏武四時食制曰：班魚頭中有石如珠，出北海。廣志曰：班魚頭中有玉石如珠，璣雨航雜錄曰：石首魚腦中有白石如碁子，取其石以爲器，或飲食遇毒則爆裂腦漏者用。其石燒灰吹入鼻中，卽愈。又下石淋嶺表錄異曰：石頭魚狀如鮑魚，隨其大小，腦中有二石子如蕎麥，瑩白如玉，有好奇者多市魚之小者，貯於竹器，任其壞爛，卽淘之取其魚腦石子以植酒籌，頗脫俗。酉陽雜

王會篇箋釋

卷下

重

俎云：傍海大魚脊上有石，此皆所謂魚石也。鄭云：出瑱狀如凝膏，在水上，據形求之，當卽後世所稱水母。郭璞江賦云：水母曰蝦，博物志曰：東海有物狀如凝血，縱廣數尺，名曰鮮魚，無頭目，無腹臍，所處則眾蝦附之。越人煮食之，案鮓與鮭同嶺表錄異曰：水母廣州謂之水母，閩謂之鮓，癡駕切其形乃渾然凝結一物

有淡紫色者，有白色者，大如覆帽，小者如盃，腹下有物如懸絮，俗謂之足，而無口，眼常有數十蝦寄腹下，啣食其涎，浮泛水上，捕者或遇之，卽歛然而沒，乃是蝦，有所見耳。南中好食之，性煖，治河魚之疾，集韻云：蟻符非切，魚名也。出北海，水上狀如凝脂，一曰水母。

也又按擊閭鄭云似鮐魚大五六尺鮐乃河豚之別名以形推之當是江豚一名鱒鱒一名鮡魚一名奔鱒又一名海豚蓋此物本出于海也酉陽雜俎云奔鱒非魚非蛟大如船長二三丈頂上有孔通頭氣出嚇嚇作聲必大風行者以爲候臨海水土記曰海豨魚豕頭身長九尺按水母以鹽漬之可致遠擊閭殆亦乾而致之故北海之物可入中國也

河魷

鄭氏曰魷當作鼃鼃狀如鼈而大月令季夏命漁人伐鮫取鼃登鼃取鼃也王氏補注曰集韻鼃或作魷秋濤曰按字書魷卽鼃之別體一切經音義引三蒼

王會篇箋釋

卷下

音

云鼃似鼈而大也字體從鼃從元此鄭氏所本楚辭云乘白鼃兮逐文魚王逸注大鼈爲鼃魚屬也以其魚屬故或從魚左傳鄭子公染指鼃羹孟子趙岐注引作魷羹是漢人多作魷也六書故曰鼃似鼈而橢長大者幾丈淮南子萬畢術云鼃脂得火可以然鐵燒鼃致鼃爾雅翼以鼃爲介蟲之元說本續漢書五行志注

江鱓大龜

鄭氏曰鱓或作鼃鼃狀如蜥蜴長六七尺鱓或爲鱣鱣鯉也王氏補注曰說文鱓魚名皮可爲鼓禹貢九江納錫大龜漢食貨志大龜距髯長尺二寸

秋濤曰鱣卽王會篇會稽所貢之鼈也詩大雅靈臺
毛傳曰鼈魚屬說文謂鼈爲鼈魚故古書多從魚作
鱣夏小正二月剝鱣傳云以冒鼓也呂氏春秋云乃
王書樹靈鱣之鼓史記太史公自序鼈鱣與處鱣字
皆正作魚旁單云或爲鱣者按顏氏家訓曰後漢書
云鶴雀銜三鱣魚多假借爲鱣鮪之鱣俗之學士因
謂之鱣魚按魏武四時食制鱣魚大如五斗匱長一
丈郭璞注爾雅鱣長二三丈安有鶴雀能勝一者況
三頭乎鱣又純灰色無文章也鱣魚長者不過三尺
大者不過三指黃地黑文故都講云蛇鱣卿大夫服

王會篇箋釋

卷下

三

之象也續漢書及搜神記亦說此事皆作鱣字孫卿
云魚鼈鱣鱣及韓非說苑皆曰鱣似蛇並作鱣字假
鱣字爲鱣字其來久矣據此是鱣鱣二字古相通借
故此鱣又作鱣云鱣鱣也與詩毛傳同按爾雅釋魚
云鱣鱣鱣鮪鮪爾雅舍人孫炎注皆以鱣一名鱣
鱣一名鮪鱣一名鮪毛傳及說文皆同其義至陸璣
疏言鱣鱣形狀迥殊郭景純注爾雅始分爲六魚詩
疏引郭氏音義云先儒及毛詩訓傳皆謂此魚有兩
名今此魚種類形狀有殊無緣強合之爲一物是郭
不從舊說也陸德明釋文謂目驗毛傳與世不協從
郭注自後箋蟲魚者多從郭說鄭康成在郭注未出

以前此註仍用舊說王伯申尙書以舍人及孫注爲是云鯉鱣之鱣自是魚之小者鱣鮪之鱣乃是大魚之名故爾雅之鯉鱣與鱣鱧並稱而不與下文之鮪鮪鮪相通明非鱣鮪之鱣自毛公釋詩之鱣鮪始誤以鱣爲鯉則不知鱣鮪之鱣非鯉鱣之鱣也段氏說文注曰郭注云鱣大魚似鱣而短鼻口在領下體有邪行甲無鱗肉黃大者長二三丈此卽今江中及關東之黃魚也如其言則鱣絕非鯉矣周頌有鱣有鮪鱣鱣鯉鱣鯉並言似非一物而箋云鱣大魚也然則凡鯉曰鯉大鯉曰鱣猶小鮪曰鮪大鮪曰鮪謂鱣與鯉鮪與鮪不必同形而要各爲類也許意當亦如是秋濤按以魚之形類攷之自當以郭說爲正從王氏說則爾雅舊說亦不可廢然祇可訓鯉爲鱣不可訓鱣爲鯉毛許鄭皆誤讀爾雅之文也從段氏說則疑鱣卽鯉之類蒙按鯉有鱣鱣無鱣其狀迥殊若鱣可指爲大鯉則鹿亦可稱野馬矣古人著書間不免誤毋庸爲之諱也

五湖元唐

秋濤按元當作元說詳後

鄭氏曰五湖揚州浸也今屬吳元唐未聞王氏補注

曰國語韋昭注太湖卽五湖

秋濤曰周官職方氏揚州其澤藪曰具區其浸五湖

鄭注曰具區五湖在吳南周官義疏曰按張勃陸龜

蒙輩皆謂五湖卽太湖。或云以周行五百里故名。或云上稟咸池五車之氣。或云環湖隨地異稱。有菱湖。莫湖。游湖。貢湖。胥湖之別。若然。則經旣言澤藪具區。不必更言其浸五湖矣。且揚州地域遼闊。湖浸繁多。何爲舍其可紀者。而必複舉具區之一以當二乎。是則具區縱有五湖之名。而必非職方之五湖也。虞翻曰。滬湖。洮湖。射湖。貴湖。及太湖爲五。韋昭曰。胥湖。蠡湖。洮湖。滬湖。就太湖而五。李圖以彭蠡。巢湖。鑑湖。洞庭。并太湖而五。柯山以射陽湖。丹陽湖。彭蠡湖。青草湖。并太湖而五。洞庭。青草。當屬荊州。非揚域也。大抵楚州之射陽。洪州之彭蠡。巢縣之巢湖。暨洮滬鑑等。

王會篇箋釋

卷下

五

皆爲南方之浸。或當數其尤大之五者。而具區旣列澤藪。則不復數之歟。元唐鄭注未詳。或謂水經沔水注有水唐疑卽元唐。按水唐戴校改爲水虎。與十道志襄沔記所言水虎合。則水唐乃譌字不足爲據。以管見考之。元唐當卽鮠。居耶徒耶切也。博雅。鮠。鮠。鮠。

鮠也。王伯申疏證不解鮠。鮠之義。蒙按類篇引博雅。河鮠。鮠也。又引鮠。鮠也。集韻亦引河鮠。鮠也。是鮠上當有河字。蓋此魚複名。一曰河鮠。一曰鮠。鮠古字本無偏旁。故大傳作亢。唐亢元字形相似。傳寫譌爲元。唐耳古者。蟲魚多以疊韻爲名。以是知元唐誤亢。唐不誤也。說文以鮠爲哆口魚。玉篇以爲黃頰魚。史

記司馬相如傳鱮鱮鮓鮓鮓鮓漢書注載郭璞注云鮓鮓也一云黃頰東山經番條之山減水其中多鮓魚注亦云一名黃頰按伯申疏證及郝蘭皋山海經箋疏並謂黃頰又名鮓鮓即詩小雅鮓鮓之鮓陸璣疏以爲黃頰魚者也攷本草綱目魚名黃頰有二一則鮓魚在魚類一則黃頰魚即黃鮓在無鱗魚類是此二種魚皆名黃頰而一有鱗一無鱗不可溷爲一也攷郭景純但云鮓魚一名黃頰不云即詩之鮓則二魚本非一物伯申引詩鮓魚又引本草之鮓魚爲證恐讀者疑惑故詳辨之本草云鮓生江湖中體似鰻而腹平頭似鮓而口大頰似鮓而色黃鱗似鱗而稍細大者三四十斤啖魚甚毒池中有此不能畜魚其性獨行故曰鰻詩云其魚魴鰻是矣此即鮓之形狀所謂亢唐者也

鉅野菱

鄭氏曰鉅大也鉅

一本奪鉅字

野魯藪今屬山陽菱芡王

氏補注曰鉅野在濟州鉅野縣

秋濤按宋鉅野縣即漢以來舊治在今山

東曹州府鉅野縣南

一名大野職方兗州藪廣志曰鉅野大菱

秋濤按原奪大菱二字今依太平御覽九百七十五卷所引增

大於常菱

秋濤曰禹貢徐州大野既豬地理志山陽郡鉅野大

壑澤在北水經濟水注引何承天曰鉅野湖澤廣大

南通洙泗北連清濟舊縣故城正在澤中左傳哀十

王會篇箋釋

卷下

三

四年西狩于大野獲麟。卽此海內東經云。濟水出共山南東邱。絕鉅野澤。注渤海。水經云。濟水東至乘氏縣西分爲二。其一水南流。其一水從縣東流入鉅野澤。元和郡縣志云。大野澤在鉅野縣東五里。南北三百里。東西百餘里。胡氏渭曰。此地屢遭河患。自漢以來。衝決填淤。凡四五度。逮元至正四年。河又決入鉅野。嘉祥汶上任城等縣。皆罹水患。及河南徙澤。遂涸爲平陸。而畔岸不可復識矣。宋史宦者傳云。梁山灤古鉅野澤。吳氏澄于氏欽皆云。然拙明以灤爲大野澤之下流。非卽大野也。爾雅釋草。菱。葦。也。從艸。凌聲。加籩之實。菱說文。菱。芰也。從艸。凌聲。

王會篇箋釋

卷下

无

鉅定羸

鄭氏曰。鉅定澤也。今屬樂安。

秋濤按。樂安。西漢縣。東漢爲國。屬千乘郡。在今

山東青州府博興縣北

有故縣屬齊。

秋濤按。西漢鉅定縣。故城在今青州府濤光縣西北

八十里。東漢無此縣。故鄭君言故縣也。

羸。蝸牛。王氏補注曰。漢志齊郡

鉅定縣。水經注。淄水自利縣東北流。逕東安平城北。

又東。逕巨淀縣。故城南。縣東南則巨澱湖。蓋以水受

名也。河渠書。東海引鉅定國語注。羸。蚌蛤屬。亦作螺。

秋濤曰。漢書地理志。齊郡臨朐下曰。石膏山。泔水。

今本

作泔

水。誤。所出。東北至廣饒。入鉅定。又廣下曰。爲山。濁水

所出。東北至廣饒。入鉅定。又云。馬車瀆水。首受鉅定。

說文云。泔水。

今本作泔。水從桂氏。馥說改正。

出齊臨朐高山。東北入

鉅定濁水出齊郡廣

今本作厲誤從段注本改

媯山東北入鉅定

水經注鉅定皆作巨淀定與淀古今字也今青州府

樂安縣東北四十里有清水泊卽古鉅定澤矣又案

易離爲羸卽今之螺字蚌蛤之屬也爾雅蚶羸蚶蚶

郭璞注云卽蝸牛也是蝸牛名蚶羸說文蝸羸也廣

韻蝸牛小螺也廣雅蠡羸蝸牛蚶蚶也是蝸牛古亦

單言羸也儀禮士冠篇葵菹羸醢鄭注云今文羸爲

蝸內則蝸醢以下二十六物鄭以爲皆人君燕所食

也東山經青要之山是多僕纍蒲盧郭注僕纍蝸牛

也郝氏懿行曰蒲盧聲轉爲僕纍卽蟻螺也郭注西

次三經槐江之山云羸母卽蟻螺是矣又聲轉爲蚶

王會篇箋釋

卷下

卑

羸卽蒲盧也吳語云其民必移就蒲羸于東海之濱
是矣是僕纍蒲盧同類之物並生于水澤下溼之地
也秋濤按山海經以僕纍蒲盧並言則非一物也郝
以蒲盧聲轉爲僕纍是合二物爲一誤矣攷廣雅蛙
蝻蒲盧也夏小正十月云雉入于淮爲蜃傳云蜃者
蒲盧也按蜃爲大蛤是蒲盧蛤也非羸也僕纍蒲盧
同類而不同物細爲剖析而古義始明

濟

秋濤按盧本作詹諸詹不从目注同

鄭氏曰瞻諸鼃鼃也秋濤按盧本作詹諸鼃鼃也王氏補注曰沈

水出河南府王屋山東流至孟州濟源縣而名濟水

字本作沛淮南子詹諸注蝦蟇

秋濤曰。濟四瀆之一。字本作洑。其从齊之字。乃別一水。說文。濟水出常山。房子。贊皇山。東入沘。是也。經典相承。借濟爲洑。而應

劭風俗通。遂誤以常山房子之水。列入四瀆。宜爲酈

大使所譏也。爾雅。鼃。鼃。諸。郭璞注云。似蝦。蟄居陸

地。淮南謂之去蛟。說文。鼃。字注用爾雅之文。曰。无鼃

詹諸也。按。瞻諸。詹諸。蟾諸。並聲同字通。實一物也。玉

篇。醜字注。又作蟾。蟾。又无醜。或轉爲鼓。造以轉語。求

之无與鼓音相近。醜在幽部。而造字古音亦在幽部

二字同聲。故淮南說林篇。鼓造。辟兵。文子上德篇。鼓

造。作蟾。蟾是也。蟾。蟾。卽此瞻諸也。今通作蟾。蟾。而瞻

諸等字罕用矣。

王會篇箋釋 卷下

學

孟諸靈龜

鄭氏曰。孟諸。未藪也。龜俯者靈。秋濤按。盧本。俯下有首字。周禮。天

龜曰靈。屬王氏補注曰。孟諸在應天府虞城縣。秋濤按。唐

宋虞城縣在今河南歸德府。虞城縣西南三里。一作盟豬。職方青州藪左傳

孟諸之麋。

秋濤曰。禹貢。豫州。導滎澤。被孟豬。史記作明都。漢書

作盟諸。職方作望諸。鄭注。望諸。明都也。爾雅。宋有孟

諸。始作孟諸二字。與大傳及左傳同。豬諸都同韻。孟

望。明。盟。古聲近也。漢書地理志。以孟豬在梁國睢陽

縣東北。睢陽故城在今河南歸德府商邱縣南二里。元和郡縣志云。孟諸

澤在虞城縣西北十里。周迴五十里。胡氏渭曰。今在

商邱東北接虞城界也。郝氏懿行曰：睢陽自宋末以來屢遭河決，藪澤厓岸不可復識。鄭云：龜俯者靈，爾雅釋魚文也。郭璞注爾雅云：行頭低，周官卜師凡卜辨龜之上下左右陰陽以授命龜者。鄭注云：下俯者也。又周官龜人：天龜曰靈，屬鄭注云：色謂天龜。玄俯者靈，天龜俯是靈龜，卽天龜矣。

隆谷玄玉

秋濤按隆一作隆非

鄭氏曰：隆讀如厯降之降，或作函谷。秋濤按：盧本函作函今河南穀城西關山也。王氏補注曰：鄭注立政云：三亳者東成、皋南、轅轅，西降谷。秦函谷關在陝州靈寶縣西南，漢弘農縣淮南子散宜生得玄玉百工以獻於紂。

王會篇箋釋

卷下

聖

秋濤按：高誘注云：二玉爲一工也。按說文：二玉爲珏，珏一聲之轉。

秋濤曰：書立政三亳阪尹。孔疏曰：阪地尹長。傳言山阪之地立長爾，不知指何處也。鄭以三亳阪尹共爲一事，云舊都分爲三，其長居險。王氏鳴盛曰：降谷不知所在。續志：河南穀城縣有函谷關，志又稱弘農郡弘農亦有函谷關者，以山谷深邃，介連兩地，故分載之耳。意者穀城之函谷卽降谷，降古讀若洪聲轉而相亂歟。秋濤按：鄭注大傳明言降谷卽函谷，且確指其在穀城矣。西莊偶未照也。西山經：峯音密山，丹水出焉。西流注于稷澤，其中多白玉。是有玉膏，其原沸沸湯湯。黃帝是食是饗，是生玄玉。郭注曰：言玉膏中又

生黑玉也。按崋山地在今新疆。疑卽產玉之密爾岱山也。又于寘產玉之川。有白玉河。綠玉河。烏玉河。皆在今和闐地。烏玉卽玄玉也。禮玉藻篇云公侯佩山玄玉。文選注引王逸言黑如醕漆玉之符彩也。

大都鯉魚刀

鄭氏曰大都明都鯉

本注渠成切

魚。今江南以爲鮑魚刀

魚。兵如刀者也。王氏補注曰史記道荷澤被明都索隱音孟豬。說文鯉魚名。漢書注鯉刀魚也。

秋濤曰按史記明都卽禹貢孟豬。鄭注職方云望諸明都也。大傳前已有孟諸。此大都鄭復云明都。或疑有誤。今按太平御覽九百三十九卷引魏武四時食

王會篇箋釋

卷下

望

制曰望魚側如刀。可以刈草。出豫章明都澤。

一云金澤按

此則鄭注所云明都乃豫章之澤。非孟豬之明都也。

望魚卽此魚刀矣。爾雅謂之鯉鱣。刀鱣望一聲之轉。

爾雅郭注云今之鯿魚也。亦呼爲魴魚。南山經茗水

北流注於具區。其中多鯿魚。郭璞注鯿魚狹薄而長

頭大者尺餘。一名刀魚。鯿音祚。啟反。郝氏懿行曰今

海中亦有刀魚。登萊間人呼林刀魚。蓋林卽鯿聲之

轉矣。楊慎異魚圖贊云明都溢澤望魚之沼形側如

刀。可以刈草。卽本四時食制爲說。說文云鯿歛而不

食。刀魚也。九江有之。秋濤按九江豫章相近。此亦大

傳魚刀出大都之一證矣。邵氏晉涵曰鯿魚卽今鱣

魚也細鱗白色吻有二鬚腹下有角刺利若刀肉多細刺人炙食之南方謂之江鱮經廣韻又胡頂切不言其狀埤雅廣要云魴一名經未知其審

咸會於中國

鄭氏曰言德能及之異物來至也

湯四方獻令

伊尹朝獻商書

不周書錄中以事類來附

秋濤按此周書周史掌之以事類附入商事故識此文也

孔氏晁傳曰言別有此書也王會俱朝貢事故今附合

湯問伊尹曰諸侯來獻或無牛馬

秋濤按一作馬牛

之所生而

王會篇箋釋

卷下

器

獻遠方之物事實相反不利

孔氏曰非其所有而當遠求其

秋濤按一作於

民故不利也

今吾欲因其地勢所有獻之易得而必貴其為四方獻

令秋濤按易得而不貴一本作必易得而不貴是也

孔氏曰制其品物秋濤按一作服之令

伊尹受命

秋濤按一本此下有於是二字

為四方令曰臣請正東符斐

仇州伊慮漚深九夷十蠻越漚鬻髮文身

本注鬻即淺切秋濤按一

本奪髮字

孔氏曰九夷十蠻者

秋濤按此句一作十者

東夷蠻越之別稱

秋濤按孔注蓋當依別本為是孔意以文身上十國為東夷故云十者東夷之別稱也與下文六者南蠻之別稱九者西戎之別稱十二者北狄之別稱文法正同此本蓋後人所改非孔之舊也惟九夷十蠻

蓋總括之詞似非國名諸國依下所詮釋亦不合十數孔之斯注爲不協矣

鬚髮文身因其事以名也王氏補注曰符婁後漢東夷傳有夫餘

國在玄菟北挹婁古肅慎之國仇州伊慮未詳仇州

海中洲漢遼東郡有無慮縣顏氏注卽所謂醫無閭

伊慮卽醫閭也漚深卽歐也王氏自注見上九夷東夷傳夷

有九種曰畎夷干夷方夷黃夷白夷赤夷玄夷風夷

陽夷竹書紀年后芬三年九夷來御孔子欲居九夷

王氏自注爾雅疏九夷一曰玄菟二樂浪三高驪十四滿飾五鳧更六索家七東屠八倭人九天鄗十

蠻書武王通道于九夷八蠻職方四夷八蠻蠻類有

八天竺咳首儵僂跂踵穿胸儋耳狗軹旁脊爾雅六

蠻此云十蠻言其非一而已越禹之苗裔封會稽世

王會篇箋釋

卷下

巽

本芊姓東越閩君皆其後又交趾之南有越裳國漚

亦歐也鬚髮垂史記越文身斷髮趙世家云翦髮文

身歐越之民也吳世家注常在水中故斷其髮文其

身以象龍子故不見傷害王氏自注地理志以避蛟龍之害王制東方曰夷被

髮文身通典文身國梁時閩焉在倭東北人體有文如獸額上有三文

秋濤曰按符卽夫餘王會之濊人也疾言曰符徐言

曰夫餘濊卽夫餘二字之合音通典載夫餘國後漢

時始通順帝永和初其王來朝其印文言濊王之印

蓋本濊貊之地其國在長城之北去玄菟千里南與

高句麗東與挹婁西與鮮卑接婁卽挹婁王會之稷

慎也盛京通志漢挹婁卽古之肅慎在夫餘東北千

餘里濱大海南與北沃沮接詳前稷慎下仇州浚儀
云海 中洲按通典列琉球于東夷仇州與琉球音相
近仇求古字通用疑卽其地今閩東之琉球國也伊
慮卽醫閩楚詞遠遊篇云夕始臨乎於微閩王逸注
東方之玉山也引爾雅醫無閩爲釋醫無閩作於微
閩亦聲之轉也海內南經伯慮國郭注未詳郝氏懿
行曰伊尹四方令正東伊慮疑卽此秋濤按伯伊字
形相近疑其譌也浚儀意以漚深爲一國按漚當卽
温州之東甌也詳前歐人蟬蛇下深疑卽王會之曰
深也詳前目深下論語云子欲居九夷劉氏七經小
傳云九夷蓋在徐州莒魯之間中國之夷非海外之

王會篇箋釋

卷下

吳

夷也呂氏大事記云史記李斯曰惠王用張儀之計
南取漢中包九夷制鄢郢戰國策張儀曰楚破南陽
九夷內沛許鄢陵危以此考之九夷之地略可見方
孔子在陳蔡相去蓋不遠也秋濤按九夷十蠻蓋部
落眾多本非一地劉原父呂東萊以九夷在徐州南
陽之間存以備攷越有百越之稱其類甚多詳前千
越東越會稽下或以越漚爲一國按上已有漚則此
漚疑卽建甯府之西甌也詳前且甌文屨下云鬻髮
者按說文鬻女鬻垂貌也楚詞招魂云盛鬻不同制
王逸注鬻鬻也裝飾兩結垂鬻下髮又長髮曼鬻注
云曼澤也言美人長髮工結鬻鬻滑澤以是攷之則

鬻髮蓋謂垂髮也通典倭國婦女被髮屈紒卽其類矣或以鬻爲翦之假借蓋斷髮也引曲禮蚤鬻爲證其說亦通云文身者南史有文身國在倭國東北七千餘里卽通典所載也又史言倭國男子皆黥面文身自言太伯之後又辰韓男女近倭亦文身馬韓南界近倭亦有文身者史記吳太伯世家云太伯仲雍二人乃犇荆蠻文身斷髮示不可用是古時吳越甌閩之地多有此俗也

請令以魚皮之鞞按一本鞞上無方空非鞞一作鮫鞞之醬鮫厥利劍爲獻本注鞞布頂切秋濤

孔氏曰鞞刀削劍

秋濤按劍上當有鞞字

魚名厥盾也鮫皮作

王會篇箋釋

卷下

皇

之鮫文魚也王氏補注曰左傳注鞞佩刀削上飾詩鞞琫有琕正義鞞今刀鞘說文烏鰂魚名荀子楚人鮫革爲甲方言盾或謂之厭王氏自注音伐或作厭後漢志佩刀乘輿半鮫魚鱗山海經注鮫皮可飾刀劍口本草

注沙魚一名鮫

秋濤曰魚皮卽尙書大傳之魚革也說已見前徐氏竹書統箋引此作魚支之鞞誤也盧抱經學士云口疑是烏字王懷祖先生讀書雜志曰案北堂書鈔酒食部五引作鰂鰂之醬又引注云鰂鰂魚名玉篇鰂午胡切魚名廣韻作鰂未知其審秋濤按說文鰂鰂魚也然說文無鰂字段氏以爲俗字改爲烏玉篇則有

鷓字注云鷓魚本作鳥是玉篇亦不以鷓爲正字
矣按鳥鰓本魚名自南越記謂此魚能浮水上卷取
鳥故名鳥賊後人皆從其說然此言特因其名而傳
會耳觀四方令有鰓字則鷓字亦有所本未可遽以
爲非也吳都賦作鳥賊賊或作鰓六書故云形如革
囊口在腹下足生口旁兩須如纜又名纜魚腹有墨
又名墨魚古人甚重之鮫說文海魚也皮可飾刀中
山經荆山漳水其中多鮫魚郭注鮫鮫魚類也皮有
珠文而堅尾長三四尺末有毒螫人皮可飾刀劔口
錯治材角今臨海郡亦有之初學記引劉欣期交州
記曰鮫魚出合浦長三尺背上有甲珠文堅彊可以

王會篇箋釋

卷下

哭

飾刀口又可以鑣物郝氏懿行曰長三尺當作三丈
張揖子虛賦注云蛟狀魚蛇尾皮有珠也蛟卽鮫字
古通用海內西經鳳皇鸞鳥皆戴厭郭注音伐盾也
正南甌鄧桂國損子產里百濮九菌本注里一作重秋
壽按太平御覽七
百九十一卷引此甌作歐鄧作
禮損子作指子產里作陸童

孔氏曰六者南蠻之別名

秋濤按據王注
則當爲七國

王氏補注

曰百濮見左傳鄧曼姓甌卽甌駱山海經桂林八樹
在番禺東秦南取百粵之地爲桂林郡漢曰鬱林餘
未詳後漢注里蠻之別號今呼爲俚人

秋濤曰浚儀以甌爲甌駱蓋指西甌駱也今廣西潯
州府貴縣及越南占城等國皆其地說互詳前路人

下淮南子云楚人地垣之以鄧林高誘注鄧林沔水上險史記云楚阻之以鄧林集解引山海經夸父棄其杖化爲鄧林駟謂鄧林後遂爲林名索隱云蓋非在中國也劉氏以爲今襄州南鳳林山是古鄧祁侯國故云阻以鄧林也秋濤按海外北經明言夸父飲于河渭不足北飲大澤未至道渴而死棄其杖化爲鄧林則鄧林在河渭之北非此正南方之鄧也諸家注皆誤若此所云則卽古鄧國左傳巴濮楚鄧吾南土是也浚儀所解得之桂國當卽秦桂林郡漢改曰鬱林郡治在今廣西潯州府境舊唐書云桂州臨桂縣州所治故秦時立爲桂林郡一統志曰按秦桂林郡在鬱林舊唐書以臨桂當之誤也攷今桂林府治臨桂縣漢置始安縣屬零陵郡吳置始安郡于此梁置桂州至唐貞觀八年始改爲臨桂縣與秦之桂林郡迥異不可溷也摺子太平御覽引此作指子攷海外南經云三苗國載國在其東其爲人黃能操弓射蛇郭注音秩亦音替大荒南經有載民之國帝舜生無淫降載處是謂巫載民巫載民盼姓食穀不續不經服也不稼不穡食也爰有歌舞之鳥鸞鳥自歌鳳鳥自舞郭注言此國自然有布帛五穀今按載字從至得聲音與指相近當卽商初之指子國也產里太平御覽引此作陸童或曰陸童蓋陸終之後楚之先

也史記楚世家吳回生陸終陸終生子六人六曰季連芊姓楚其後也史言季連生附沮附沮生穴熊其後中微或在中國或在蠻夷弗能紀其世周文王之時季連之苗裔曰鬻熊成王時而封鬻熊曾孫熊繹於楚疑當商初時季連之裔在蠻夷中卽以陸童爲國號故伊尹列于正南諸國中也秋濤按商頌云維彼荆楚居國南鄉竹書紀年夏癸二十一年商師征荆荆降是夏商時已有荆楚之國其卽爲陸終之後與否未知其審百濮詳前卜人下九菌者大荒南經有小人名曰菌人郭注音如朝菌之菌畢尙書曰此卽大荒東經靖人也按菌與靖古音不同部蓋非一

王會篇箋釋

卷下

辛

國疑菌人卽此九菌海內經曰南海之內有衡山有菌山有桂山山名菌桂蓋各以所產物爲名此九菌國其地必產菌葦故因而命之呂氏春秋云和之美者越駱之菌說文云菌地葦是也高誘注以菌爲竹筍非是下文以菌爲獻當卽九菌貢其土產矣

請令以珠璣瑋瑁象齒文犀翠羽菌鶴秋濤按一作鶴矩秋濤按一

作短同狗爲獻

孔氏曰璣似珠而小菌秋濤按菌與鶴非一物此下蓋有奪字鶴可用爲旌翳矩狗狗之善者也

秋濤曰瑋瑁亦作玳瑁南州異物志云生南方海中大者如蘆蔕背上有鱗大如扇發取其鱗因見其文

欲以作器則莫之因以刀截任意所作本草云似龜
甲有文解毒兼辟邪史記曰趙使人於春申君欲夸
楚爲瑋瑋簪漢書西域傳贊云明珠文甲如渫曰文
甲卽瑋瑋也爾雅犀似豕郭注形似水牛豬頭大腹
庫腳腳有三蹠黑色三角一在頂上一在額上一在
鼻上鼻上者卽食角也小而不橢好食棘亦有一角
者吳語云奉文犀之渠章昭注文犀犀角之有文理
者也按犀角成文厥類實繁通天駭雞見珍往籍其
餘不可勝紀也海內經曰有青獸如兔名曰菌狗有
翠鳥有孔鳥按此經上文云南方有贛巨人則此亦
南方物也菌狗疑卽矩狗菌言其小猶大荒經所云
王會篇箋釋

卷下

至

有小人名曰菌人也海內經本作菌狗今本上从少
誤郝氏懿行云菌蓋古菌字其上从少如芬薰字今
皆从艸古从少作芬薰字是其例也伊尹四方令云
菌鶴短狗疑卽此物也按菌鶴矩狗當是三物蘭皋
以爲一非矣

正西昆侖狗國鬼親枳己闕耳貫胸雕題離邱漆齒

文選注作離身染齒後漢注胸作匈雕作彫闕徒蓋切
一作闕秋濤按一本昆侖侖作崑崙非是此種古字當存
也之

孔氏曰九者西戎之別名也闕耳貫胸雕題漆齒

按一本
有等字亦因其事以名之王氏補注曰禹貢織皮昆
侖王肅曰昆侖在臨羌西

王氏自注今
蘭州之地狗國犬戎也

唐天文志聲教所不暨皆係于狗國鬼親鬼方也通
典流鬼在北海之地鬼國在駿馬國西枳己未詳左
傳衛侯入于戎州己氏在楚邱縣秋濤按楚邱非正
西也疑本西方之
戎後遷于衛地故爾雅疏蠻類有狗軹關耳山海經
亦有己氏之名耳
有聶耳離耳國呂氏春秋北懷關耳貫胸山海經其
爲人匈有竅尸子曰貫匈者黃帝之德嘗致之爾雅
疏蠻類有穿胸雕題王制曰南方曰蠻雕題雕刻鏤
也題額也刻其肌以丹青涅之山海經有彫題國通
典百越古謂之雕題離身山海經有三身國一首三
身漆齒山海經有黑齒國齒如漆後漢東夷傳自朱
儒東南至黑齒國唐黑齒常之百濟西部人

王會篇箋釋

卷下

至

秋濤曰禹貢之昆侖國當卽在昆侖山旁言昆侖者
人人殊當以爾雅河出昆侖虛之言爲斷徐氏松漢
書西域傳補注曰西藏東北三百十里有岡底斯里
卽古崑崙釋氏謂之阿耨達其山分四幹向北者曰
僧格喀巴布當和闐正南分爲二支一支東趨爲張
騫傳及此傳所稱南山以在西域之南也一支過和
闐西北趨千六百餘里又西而北折又折而東環千
八百餘里統名蔥嶺蔥嶺又東趨爲天山過回疆北
至巴里坤東北而止是爲西域之北山戴氏震水地
記曰自紫山西連犛石山又南迤西連接恆水所出
山今呼岡底斯者互二千里皆古昆崙之虛也又曰

河源以南唐吐蕃今西藏之境古昆崙國在焉云狗國者攷海內北經犬封國曰犬戎國狀如犬郭注黃帝之後生白犬二頭自相牝牡遂爲此國言狗國也據景純之言則狗國卽犬戎耳經又云環狗其爲人獸首人身郝氏懿行曰伊尹四方令狗國卽此易林云穿胸狗邦淮南墜形訓亦有狗國云鬼親者浚儀以爲鬼方其說近是詳前方人下海內北經有鬼國在貳負之尸北爲物人面而一目魏志東夷傳云女王國北有鬼國唐書云流鬼在北海之北北至夜叉國餘三面皆抵大海鬼國在駁馬國西六十日行其國夜遊晝隱口在頂上按諸家所紀鬼國或在東或

王會篇箋釋

卷下

五

在北皆不在正西非此也浚儀引唐書流鬼鬼國以證鬼方揆之地形斯爲舛矣枳已浚儀云未詳今按枳已疑卽所謂南己之市也墨子云舜西教乎七戎道死葬南己之市後漢書王符傳注引作南巴畢尙書以作巴者爲是舜葬九疑九疑古巴地也王懷祖先生曰按北堂書鈔及初學記禮部下引墨子並作南己後漢書趙咨傳注及太平御覽並引作南紀呂氏春秋安死篇舜葬于紀市卽所謂南紀之市則己非誤字也若是巴字則不得與紀通矣墨子稱舜葬地本不與諸書同不必牽合舜葬九疑之文也按墨所言舜事雖不足信然所稱七戎之地必據戰國時

輿地而言則紀市爲戎灼然可據紀市與枳已聲近蓋卽一地也高誘注呂覽云九疑山下亦有紀邑當有所受之矣闕耳或疑卽聶耳按海外北經聶耳國爲人兩手聶其耳郭注言耳長行則聶持之也按孔氏注云闕耳爲飾則與耳長攝持義別說文云闕樓上戶也當取耳孔洞達爲義今四川省西金川之地夷人幼時穿耳卽用樺皮卷塞日漸增添後遂可貫拇指當銜巨環大於跳脫蓋卽闕耳之俗矣又海內北經闕非人面而獸身青色郝蘭皋曰耳非形相近伊尹四方令正西闕耳疑卽此海外南經有貫胸國畢注曰淮南子墜形訓有穿胸氏高誘注云穿孔達

王會篇箋釋

卷下

著

背竹書紀年云黃帝軒轅氏五十九年貫胸氏來賓括地圖云禹平天下會于會稽之野又南經防風之神弩射之有迅雷二神恐以刃自貫其心禹哀之乃拔刀療以不死之草皆生是爲貫胸之民博物志云穿胸民去會稽萬五千里俱見李善文選注按竹書黃帝時已有貫胸民則括地圖之言未得其實也異物志曰穿胸之國去其衣則無自然者蓋似效此貫胸民也秋濤按詳此則穿胸者亦不過雕鏤其胸以爲飾非眞胸背穿透也沈佺期泛海詩云嘗聞交趾郡南與貫胸連似貫胸在交阯南矣雕題國亦見海內南經郭注黥涅其面畫體爲鱗采卽鮫人也按桂

海虞衡志云黎人女及笄卽黥頰爲細花紋謂之繡面女亦其類也郭云卽鮫人非是海內南經又有離耳國與雕題相屬蓋離邱卽離耳郭注鏤離其耳分令下垂以爲飾卽儋耳也在朱崖海渚中不食五穀但噉蚌及諸蕒也秋濤按郭注以儋耳爲離耳蓋以其皆在南也注聶耳不引儋耳者在海外北經方隅不協故也水經注亦云儋耳卽離耳也可爲互證若離身則諸書無所見蓋身卽耳字之譌後儀引三身證之非也漆齒者亦謂之黑齒管子雕題黑齒注南夷之國南夷志黑齒蠻在永昌關南以漆漆其齒見人以爲飾寢食則去之文選注西屠以草染齒染

王會篇箋釋

卷下

壹

白作黑亦其類也按黎人及珠崖皆今瓊州府地黑齒在今永昌府均西南方也故伊尹以爲正西矣請令以丹青白旄紕屬江厯龍角神龜爲獻

孔氏曰江厯珠名龍解角故得也王氏補注曰荀子南海有曾青丹干西海有文旄何承天纂文曰紕氏屬也卑疑反

秋濤曰丹說文云巴蜀之赤石也詳前卜人以丹砂下青者藝文類聚引范子許然曰空青出巴郡白青曾青出弘農豫章白青出新淦青色者善本草經曰空青能化銅鐵鉛錫作金別錄云銅精熏則生空青又云綠青生山之陰穴中色青白是也白旄卽旄牛

尾之白者說詳前珥旌下爾雅云紕飾也玉篇以紕爲冠緣邊飾按雜記下云紕以爵韋鄭注在旁曰紕既夕記注飾裳在幅曰紕按在幅卽裳之邊側裊卽紕也是衣裳緣邊俱曰紕爾雅又云菴屬也屬者縑之假借說文云縑西胡毳布也書禹貢正義引舍人注爾雅曰菴謂毛屬也胡人績羊毛作衣又孫炎曰毛菴爲屬按紕屬疑是一物蓋屬而緣其邊者也詞林海錯云江歷珠名卽江驪也五侯鯖云江珠卽琥珀千年茯苓所化或云卽江歷也通典云哀牢出光珠博物志曰光珠卽江珠也

正北空同大夏莎車姑他旦略豹胡

秋壽按旦一作代旦豹一作貌

王會篇箋釋

卷下

美

翟匈奴樓煩月氏蠟犁其龍東胡

本注代一作戎

孔氏曰十二者北狄之別名也代

秋壽按一作戎

翟在西北

界戎狄之間國名也王氏補注曰空同爾雅北戴斗

極爲空桐黃帝西至于空桐

王氏自注山在隴右

史記趙襄子

娶空同氏大夏在西域月氏擊而臣之淮南子空同

大夏楊子大夏之西莎車國治莎車城姑他未詳趙

世家北滅黑姑旦略未詳豹胡北胡也代北狄之別

秦漢代縣

王氏自注今蔚州秋壽按宋蔚州卽今直隸宣化府蔚州治

翟與狄同

晉語翟祖又赤翟隗姓匈奴見山海經殷曰獯粥周

曰獯狁樓煩在晉北趙武靈王北破樓煩月氏居敦

煌祁連間與匈奴同俗蠟犁其龍未詳漢匈奴傳有

昆龍新羣國東胡在燕北見山海經燕秦開襲破東
胡秦時東胡彊月氏盛漢鮮卑東胡之支也烏桓本
東胡唐契丹奚本東胡種爾雅疏狄類有五月支穢
貊匈奴單于白屋

秋濤曰史記黃帝本紀正義引括地志空桐山在肅

州福祿縣東南唐福祿縣在今甘肅高臺縣西北志又云筭頭山一

名崆峒山在原州平高縣西百里唐平高縣卽今固原州治然此

皆西方與正北無涉錢氏拈爾雅釋地注以今順天

府薊州東北有空桐山然其地甚近似非戴斗之空

同以管見推之空同當在今蒙古地直北斗之下也

大夏已見前莎車卽漢書西域傳之莎車國去長安

王會篇箋釋

卷下

毛

九千九百里東北至都護理所四千七百里西至疎
勒五百里西南至蒲犁七百里有鐵山出青玉宣帝
時莎車王殺漢使者馮奉世發諸國兵擊殺之後漢
時莎車強盛雄于西域姑他浚儀未詳考漢書匈奴
傳姑夕王卽與烏禪幕及左地貴人共立呼韓邪單
于發左地兵四五萬人西擊握衍胸鞮單于至姑且
水北姑且疑卽姑他矣且略不知所在或曰當从別
本作且略史記匈奴傳且居漢書作且渠匈奴官號
又匈奴有且鞮侯疑因古地名命之也云豹胡卽北
胡者朔漠地多虎豹故以所產物爲國名代翟玉海
六十五百五十二引此文代翟並作戎翟王懷祖先

生讀書雜志曰作戎翟者是也孔注云在西北界戎狄之閒國名也則正文之作戎翟甚明若古代翟之國在今宣化府蔚州東則不得言在西北又不得言界戎翟之閒矣然則正文注文皆作戎翟作代翟者誤也秋濤按仍當以代翟爲是伊尹四方令明言正北非西北孔注西字恐係字誤蔚州在山戎北翟之閒則亦可云界戎翟也浚儀作玉海引此文曰戎翟至補注則以代翟爲正注文分代與翟爲二浚儀地理之學最精所見必不誤也匈奴樓煩均已見前月氏卽禺氏詳前禺氏下熾犂蓋卽新犂熾新一聲之轉漢書匈奴傳後北服渾窳屈躒丁零隔昆龍新犂

王會篇箋釋

卷下

五

之國師古曰五小國也王先生曰五小國者四隔昆五新犂龍字蓋涉上龍城而衍史記漢紀皆無龍字秋濤按據此則熾犂國在匈奴之北也其龍蓋卽龍城史記嚴安上書曰深入匈奴燔其龍城索隱曰匈奴城名音龍又匈奴傳龍城索隱曰漢書作龍城亦作龍字崔浩云西方胡皆事龍神故名大會處爲龍城後漢書云匈奴俗有三龍祠祭天神秋濤按龍城諸家不言所在以管見攷之蓋卽東方之龍城也史記云將軍衛青出上谷至龍城是龍城地南直上谷其卽慕容氏龍城無疑東胡已見前

請令以橐駝白玉野馬騊駼馱良弓爲獻

王氏補注曰漢西域傳大月氏出一封橐駝唐吐蕃獨峰駝曰馳千里爾雅野馬如馬而小出塞外鮮卑有野馬馱馱駿馬也生七日而超其母後漢東夷傳句驪別種名小水貊出好弓所謂貊弓

秋濤曰按史記匈奴奇畜有橐他索隱云韋昭曰背肉似橐故云橐也包愷音橐他或作駝山海經號山其獸多橐駝郭注有肉鞍善行流沙中日行三百里其負千斤知水泉所在也爾雅釋文橐字又作駝音託又音洛引字林云駝似鹿而大肉鞍初學記引景純圖讚云駝惟奇畜肉鞍是被迅驚流沙顯功絕域潛識泉淵徵乎其智白玉者按大夏莎車皆在西

王會篇箋釋

卷下

癸

域月氏舊國亦近祁連西域傳鄯善國多玉通典于闐有水出玉陶弘景本草注曰好玉出藍田外國疏勒于闐諸處皆善潔白如豬膏叩之鳴者是眞也野馬者穆天子傳野馬日走五百里郭注似馬而小也說文云驪駮野馬也按驪駮與駒駮馱駮並匈奴奇畜見史記說文以駒駮爲北野之良馬爾雅釋文引字林云駒駮一曰野馬也高誘淮南子主術篇注駒駮野馬也是皆以野馬卽駒駮然此篇以野馬駒駮並稱子虛賦云軼野馬而轆駒駮其爲二物甚明也說文云馱駮馬父羸子也廣異志音決蹄馱亦作題太平御覽引尸子云文軒六馱題無四寸之鍵則車

不行是也

湯曰善

王會篇箋釋卷下終

錢塘諸可寶覆勘
元和管禮昌分校

王會篇箋釋

卷下

本

王會篇

王會篇

